



2. september 2015

Inatsisartut Suleriaasianni § 37 naapertorlugu Naalakkersuisunut apeqqutit imaattut matumuuna saqqummiuppakka imminut toquttarneq pillugu aamma nuna tamakkerlugu nammineq toquttarneq pillugu pinaveersaartitsinissamut pilersaarut 2013-2019:

1) 2014-meersup peqqinnissaq pillugu pilersaarutip ilanngussartaani 5-mi oqaatigineqarpoq, 2015-mi oqarasuaatikkut siunnersuisarnerup misissornissaa ingerlanneqassamaartoq. Tamatumunnga atatillugu aamma malitsigitillugu misissorneqassamaarpoq nammineq toquttarneq pillugu pinaveersaartitsinermut atatillugu ulloq unnuarlu oqarasuaatikkut siunnersuisarneq akeqanngitsumik ingerlanneqaannassanersoq aamma ilanngullugu ilaquataasunut siunnersuisarneq ikorfartuisarnerlu.

Oqarasuaatikkut siunnersuisarnerup misissorneqarnera sumummita killippa aamma

2) Kalaallit Nunaanni nuna tamakkerlugu nammineq toquttarnerup pinaveersaartinnissaanut pilersaarut 2013-2019 Peqqinnissamut pilersaarutip ilanngussartaa 5 ilanngullugu 2014-mi iliuusissanut pilersaarusiussisoqartussaavoq nammineq toquttarnerup pinaveersaartinnissaanut pilersaarut malitseqartinniarlugu. Ilanngullugu erseqqissaatigissavara iliuusissanut pilersaarutit 2015/2016-mi piviusunngortinneqartussaammata, ilanngussaq 5 naapertorlugu. Nuna tamakkerlugu nammineq toquttarneq pillugu pinaveersaartitsinissamut pilersaarut 2013-2019 malitseqartinniarlugu iliuusissanut pilersaarusionerq sumut killippa?

3) Oqaluffiup suleqatiginissaanut imaluunniit Naalakkersuisut pilersaaruteqarpat oqaluffiup pisortatigoortumik suleqatiginissaanut aamma pilersaaruteqartoqarpa nammineq toquttarneq pillugu pinaveersaartitsinermut nunami palaseqarfiit suleqatiginissaat, ilanngullugu oqarasuaatikkut siunnersuisarneq?

4) Nammineq toquttarneq aamma imminut toqunniarluni siorasaarisarneri tpillugit kisitsisitigut naatsorsueqqissaarnerit massakkut qanoq isikkoqarpat aamma allanngortoqarnikuua pitsaanerusup tungaanut?



5) Naalackersuisut takusinnaanerlugu pisariaqartitsisoqartoq iluarsiinissamut, naleqqussaanissamut imaluunniit nammineq toquttarneq pillugu pilersaarutit suliniutillu allanngortinnissaannut aamma 2016-mut aningaasanut inatsisip suliarineranut atatillugu Naalackersuisut pilersaaruteqarpat immikkoortumi nutaaliornissamut suliniarnissamullu, ataatsimut suliniutit nukittorsarniarlugit aamma annertusarnissaannut?

6) Kalaallit Nunaanni nammineq toquttarnerup pinaveersaartinnissaanut pilersaarummi 2013-2019-mut aallaqqaataani oqaatigineqarpoq Kalaallit Nunaanni nammineq toquttartut amerlanerpaasut.

Naalackersuisut oqaatigisinnaanerlugu nunani sorlerni nammineq toquttartut amerlanerunersut Kalaallit Nunaannut naleqqiullugu? Aamma naatsorsueqqissaarneq ukiut kingulliit tallimat ingerlanerini inuit, ukiut, suaassuseq aamma procenti qanormita isikkoqarpat Kalaallit Nunaanni innuttaasunut tamanut naleqqiullugu?

7) 2014-mi pilersaarutip akuerineqartup piviusunngortinniarnernanut atatillugu Naalackersuisummita sunik aporfinnik siumuisimappat? Aamma suliamut qulaani taaneqartumut atatillugu suliassat artornarnersaat sumiinersut Naalackersuisut takusinnaanerlugu?

(Inatsisartunut ilaasortaq, Tillie Martinussen, Demokraatit)

Tunngavilersuut

Nammineq toqunniarlutik siorasaarisartut, imminu toqoriartartut imminullu toquttartut naatsorsoqqissaarnerisa inernerat 2015-mi maajimi kingullermik politiit ernumanarsiaartortut oqaatigaat aamma taamaattumik immitsinnut aperisariaqarpugut ilumut imminut toquttarnerup imminullu toqoriartarnerup pinaveersaartinnerani suliniutigut eqqortuunersut aamma naammannersut. 2013-mi ukiakkut akuersissutigaarput Kalaallit Nunaanni nuna tamakkerlugu nammineq toquttarnerup pinaveersaartinnissaanut pilersaarut 2013-2019 siunertaralugu nunami maani nammineq toquttarnerup akiornerata nutaamik suliniarfigeqqinnissaa. Ukioq manna 2015-mi pilersaarutip piviusunngortinnissaa suli utaqqivarput naak 2013-mili atuulereersimasussaagaluartoq. Aamma ilanngullugit suli ilaatigut utaqqivagut nalunaarutigineqareersoq sukumiisumik



misissuinissaq akeqanngitsumik oqarasuaatikkut siunnersuisarneq aamma nuna tamakkerlugu oqarasuaatikkut siunnersuisarfiit pillugit.

Nammineq toquttarnerup namminerlu toqunniarluni siorasaarisarnerit ikilisinnissaannut anguniakkagut angunngikkallartillugit allatut ajornartumik pilersaarutigut suliniutigullu naleqqussartariaqarpagut nutartertarlugillu. Nammineq toquttarnerup namminerlu toqunnissamut eqqarsaateqartarnerup pinaveersaartinnissaanut atatillugu uanga nammineq periarfissatut takusinnaavara suli atorineqanngitsoq tassa nunatsinni palaseqarfiit suleqataanissaat. Nunami maani innuttaasunit ilagiit ataqqineqartupilussuupput taamaattumik qanippoq apeqqutigissallugu ilagiinni sulisut ilisinernut allanullu atatillugu tarninik kiffartuussinermut misilittagaqarluartut ikiuuttarallarsinnaannginersut ulloq unnuarlu oqarasuaatikkut siunnersuisarnermut atatillugu, pinaveersaartinniarlugit piffissap ingerlanerani ataatsikkupajaaq nammineq toquttartut.

Manna periarfissaq iluatsillugu Naalakkersuisut kaammattorusuppakka pilersaarutit akuersissutaareersut piaartumik piviusunngortinniassagaat, 2013-miit 2019-mut nammineq toquttarneq pillugu pilersaarummi suliassat akuersissutaareersut iliuusissanut pilersaarutit piviusunngortitsinissarlu aatsaat 2015-mi peqqunagit. Tulliatut aamma paasissutissat kisitsisillu nutartikkat atorsinnaajuartariaqarpagut sukkanerusumik iliuuseqartarsinnaaqqulluta, pissutsit pitsaanerusumut ineriartunngippata.

Nammineq toquttarneq aamma nammineq toqunniarluni siorasaarisarnerit nunami maani piviusuupput amiilaarnartut aalassannartullu. Annernarluinnartarpoq inuit ilaat nammineq toqunniarlutik aalajangeraangata aamma qimataasarput ilaquuttat tammartussaangitsumik annaasaqartut anniaateqartussallu. Ernummatigaara suliutitta amingarsinnaaneri taamaattumik kaammattuutigeqqissavara, nammineq toquttarnerup akiorniarnernanut suliniutitta nukittorsaqqinnissaat nalilersoqqinnissaallu, kikkut tamaasa iluaqusersinnaajumallugit, nammineq toquttartut ikilisinnissaannut anguniakkagut piviusunngorsimalerpata. Naalakkersuisut kaammattussavakka suna tamaat atorlugu ajornartorsiut pissutaasullu eqqartortuassagaat.



DEMOKRAATIT
DEMOKRATERNE